



12. august 2011  
23. januar 2011

UKA 2011/20  
UPA 2011/39

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiupparput:

**Nunavummi Nunavimmilu oqartussaasut suleqatiginerisigut inuusuttunut 16-it 30-illu akornanni ukiullinnut "Nuna Job paarlaateqatigiinneq"-mik pilersitsinissaq pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartuni ilaasortat Jane Petersen aamma Juliane Henningsen, Inuit Ataqatigiit)

### **Tunngavilersuut**

Naalakkersuisut Nunavummi Nunavimmillu oqartussaasut suleqatigalugit suleqatigiinnik-kut pilersaarusoqqullugit Inatsisartut aalajangiiffigisasaattut siunnersuut matumuuna saqqummiupparput. Inuusuttut 16-it 30-illu akornanni ukiullit paarlaateqatigiinnikkut allami najugaqarsinnaanissaminnik, kiisalu nunani taakkunani tamani sulisinnaanissa-minnut neqeroorfigineqarsinnaanissaat tassani siunertaavoq.

Suleqatigiinnermik pilersaarusiorneq aqcutigalugu inuusuttut 16-it 30-illu akornanni uki-ullit Issittumi nuna alla misigisaqarfigisinnaalissavaat - suliffissaannik, ineqarfissaannik kulturikkullu pikialaartitsinerni peqataanissaannik periarfissinneqassapput, taamatullu inuusuttut inuusuttoqatimit inooriaasiat, oqaasii kulturiallu paasisaqarfigisinnaalissallugu.

Assinganik aaqqissuussineq nunani avannarlerni pioreerpoq, Nordjob-imik taaguuser-neqarluni. Taanna nunanit avannarlernit tamanit aningaasalersorneqarpoq. Nordjob-imi nunani avannarlerni innuttaasut imminnut ilisarinerulernissaat siunertaralugu aasaane-rani nunami allami imaluunniit nunani namminersorluni ingerlatsiviusuni inuusuttunut 18-it 28-illu akornanni ukiulinnut suliffissanik neqerooruteqartarpoq.

Paarlaateqatigiilluni allami najugaqarallarneq nutaanik paasisassarsiornermut ilisimasallu ineriartortinneranni inuusuttunut pingaaruteqarpoq, taamatullu inuusuttunut peqataasu-nut tamanut inerikkiartornermut sunniuteqarluni. Inuusuttut nunanit assigiinngitsu-neersut taamaalillutik imminnut ilisarisarilissapput, akunnerminnilu inuunerup ingerla-nerani atorsinnaasaminnik isumassarsioqatigiissinnaallutik. Taamatullu oqaatsinik allanik ilisimasaqalersinnaapput, kulturillu allat paasisaqarfigisinnaallugit. Paarlaateqatigiilluni allami najugaqarallarneq taamaalilluni inaarutaasumik pisinnaatitsumillu ilinniagaqaler-nissamut alloriarnerusinnaalluarpoq.

Naak nunatsinni ilinniartitaaneq pingaartillugu iliuuseqartoqaraluaqisoq malunnarsiartor-poq ilinniartinnut qinnuteqartartut itigartinneqartarnerat annertusiartortoq. Assersuu-tigalugu ukioq 2010-mi aggustusip qaammataani Piareersarfimmut qinnuteqartut 1.300-upput, inissallu 715-iinnaallutik. Sulilu inuusuttorpasuit ilinniarnertuunngorniarlutik ilin-niarfimmud qinnuteqartut, inuutissarsiutinillu tunngaviusumik ilinniartinnut qinnuteqartut itigartitaasarpud (taakkunani 500-t aamma 250-it). Tamassuma saniatigut ilinniartit tamaasa isigalugit

ilinniarnerminnik qimaguttartut 25%-iupput. Pissutsit taamaattut er-ngumanartuupput, arlaatigullu iliuuseqartoqartariaqarpoq.

Taamaattumik nunatsinni inuusuttut arlaqarnerusunik periarfissittariaqarpavut, taamaaliornikkut aamma oqaatsinik atuilluarnerusinnaanissaat, ilinniaqqinnissaminnut inerikkiartorminnullu annerunerusumik iluaqutigisinnaassammassuk, kiisalu nunatsinni, Nunavummi Nunavimmilu inooriaatsinik kulturimillu qaammaasaqarnerat annertusarneqarsinnaalluni.

#### **Aningaasartuuteqarnikkut allaffissornikkullu Pisortanut kingunerisassai.**

Siunnersuut Namminersorlutik Oqartussanut aningaasartuutaassaaq, nunatsinniimmi inuusuttut Nunavummi imaluunnit Nunavimmi paarlaateqatigiinnikkut najugaqarallarsinnaanerminnik periarfissinneqartut angalanissaannut najugaqarallarnissaannullu aningaasartuutissat immikkoortitariaqassammata. Tamassuma saniatigut kaasarfimmiusaanut ilinniagaqarnermulluunniit tapiissutit ilimagisariaqarput. Imaassinnaavorli inuusuttoq peqataasoq najugaqarallarnermi suliffittaarallarsinnaasoq, taamaattoqassappallu Nunavummi Nunavimmiluunniit sulisitsisoq aningaasanik isertitaqartitsisuususaassaaq.

Namminersorlutik Oqartussanulli aningaasartuuteqarnikkut kingunissai ersarissumik oqaatigissallugit suli siusippallaarpoq, tamannami nunatsinni Naalakkersuisut, Nunavummi Nunavimmilu oqartussaasullu akunnerminni qanoq isumaqatigiissusiorsinnaanis-saat aamma suleqatigiinnermik pilersarusiorsinnaanissaat apequtaalluinnassamat. Taamaaliornikkulli nunatsinni inuusuttut periarfissinneqassapput, taamatullu oqaatsinik allanik ilisimasaqarnerat pillugu siuarsaaniartoqarluni ingerlanerminnilu ilinniagaqalersin-naanissaminnut inerikkiartortinniarneqassallutik. Taamatut aqquissuussinerup immikkoor-tuisa ilaat Ilinniartitaanermut pilersaarummut kiisalu ilinniartitaanerup immikkut ittumik suliniuteqarfigineqarnissaa siunertaralugu aningaasaliissutinit matussuserneqarsinnaasoq periarfissatsialattut isigisariaqarpoq.

#### **Aningaasartuuteqarnikkut allaffissornikkullu namminersorlutik inuutissarsiuteqartunut kingunerisassai.**

Siunnersuut taamatut isikkoqartillugu namminersorlutik inuutissarsiuteqartunut aningaasartuuteqarnikkut allaffissornikkullu sunniuteqartussaangilaq.

#### **Aningaasarsiorinnikkut allaaffissornikkullu innuttaasunut kingunerisassai.**

Siunnersuut innuttaasunut aningaartuuteqarnikkut allaffissornikkullu toqqaannartumik kinguneqartussaangilaq, parlattuanilli inuusuttunut annertunerusumik ilinniagaqarusut-tunut inaarutaasumik piginnaasaqarfinniffiusumillu ilinniagaqalinnginnermi inerikkiarto-rusuttunut nutaanik periarfissiissaaq.